

ZENIČKO-DOBOJSKI KANTON

Budžet za građane 2016.



Zašto „Budžet za građane“

Dragi građani,

Pred vama je „Budžet za građane“ – građanski vodič koji na jednostavan način prikazuje kako se planira prikupljati i trošiti novac iz budžeta Zeničko-dobojskog kantona tokom 2016. godine. Ovo je još jedan korak ka otvorenijem i odgovornijem nastupu prema građanima u procesima donošenja važnih odluka na kantonalnom nivou.


„Budžet za građane“ ima za cilj da javnosti omogući bolji uvid i razumijevanje načina na koji vlasti vašeg Kantona planiraju, raspodjeljuju i troše sredstva iz budžeta. S obzirom na to da novac stiže u budžet Kantona od poreznih obveznika, naša je obaveza da njime raspoložemo u najboljem interesu zajednice i da građanima predstavimo tačne i razumljive podatke o izvorima prikupljenih prihoda i njihovom trošenju.

Zato smo željeli da uvažimo mišljenje što većeg broja građana o kreiranju najbitnijeg dokumenta koji donosi Vlada, a koji direktno utiče na živote svih nas na području Kantona. Ovom prilikom zahvaljujem svim građanima koji su doprinijeli da „Budžet za građane“ učinimo što boljim. Takođe, veliku zahvalnost dugujem ministru finansija, gospodinu Andreju Kajiću, i pomoćnici ministra za trezor, gospođi Nadi Delibašić, koja je bila i koordinator u čitavom projektu.

Ovaj sažeti vodič kroz Budžet namijenjen je svim građanima koji žele da budu obaviješteni o planovima Vlade za prikupljanje i trošenje novca i da prate realizaciju postavljenih ciljeva.

Nadamo se da će ovaj dokument objasniti ključna pitanja i tako Budžet učiniti pristupačnijim i razumljivijim. Očekujemo da ćete se i u narednim godinama više uključivati u budžetski proces, što će doprinijeti novom kvalitetu upravljanja Zeničko-dobojskim kantonom.

O Budžetu za građane



Novac kojim raspolazu institucije vlasti na svim nivoima u svojim **budžetima** je novac građana. Prihodi vlasti dolaze od građana kroz poreze (na prodaju roba i usluga, dohodak, plaće, imovinu...) i plaćanje raznih taksi i naknada. Pored ovoga, prihodi dolaze od **koncesija** za iskorištavanje prirodnih resursa koji su dio nacionalne baštine pa pripadaju svim građanima. Takođe, treba pomenuti da jedan dio prihoda dolazi i od naknada zagađivača za zaštitu okoliša. Čak i kada prihodi dolaze od kredita, građani su ti koji će ih morati otplatiti na kraju. Institucije vlasti su odgovorne za sredstva iz budžeta, te odlučuju u ime građana o raspodjeli prikupljenih sredstava za različite namjene.

Imajući u vidu da je Budžet i odraz lokalnih **javnih politika**, jasno je zbog čega u zemljama sa razvijenom demokratskom kulturom postoji značajan interes javnosti za mnoga pitanja koja se tiču Budžeta. Građani žele da znaju i odlučuju o tome kako će se trošiti njihov novac. Pri tome je osnovni preduslov za učešće građana u procesu odlučivanja o Budžetu njihova informisanost. U skladu s tim, zadatak organa vlasti jeste da obezbijedi javnost rada i pruži informacije o svim bitnim pitanjima u procesu kreiranja, usvajanja i izvršavanja Budžeta.

Budžet za građane je dokument koji sažima i pojašnjava osnovne informacije iz Budžeta. To je izvještaj za građane, predstavljen u pristupačnom formatu, koristi jednostavan i jasan jezik koji oni mogu razumjeti. Ako su u stanju da razumiju, građani onda mogu ostvarivati svoja građanska prava u demokratiji – oni mogu postavljati pitanja koja osiguravaju da vlast objašnjava ono šta radi u njihovo ime.

Budžet – Akt kojim se predviđaju svi prihodi i rashodi u jednoj budžetskoj godini.

Koncesija – Odobrenje nadležnog organa koje se daje fizičkim ili pravnim licima za obavljanje određene djelatnosti, ili korištenje određenih resursa, u skladu sa propisanim uslovima.

Javne politike – Plan ili smjer djelovanja vlasti.

Budžet za građane je pojednostavljen i ilustrativan prikaz određenih dijelova Budžeta.

Treba napomenuti da je sadržaj ovog dokumenta pripremljen u potpunosti uz učešće velikog broja građana Zeničko-dobojskog kantona. Tokom pripreme samog dokumenta izvršene su brojne individualne i grupne konsultacije sa građanima, predstavnicima Grada Zenice i općina, te predstavnicima nevladinih organizacija.

Ko finansira pojedine nadležnosti?

Zeničko-dobojski kanton obavlja poslove iz vlastite ustavne nadležnosti, podijeljene nadležnosti između Federacije BiH i Kantona i nadležnosti koje su mu prenesene posebnim zakonima Federacije Bosne i Hercegovine. Stoga je veoma bitno razumjeti koje nadležnosti i poslove finansira Kanton i u kojoj mjeri to čini. (Tabela 1)




Tabela 1: Finansiranje nadležnosti (zakonska obaveza i dobrovoljno finansiranje, u skladu sa opredjeljenjem kantonalne politike)

	Potpuno finansira Kanton	U većoj mjeri finansira Kanton	U manjoj mjeri finansira Kanton
Javna uprava (kantonalna)	X		
Pravosuđe	X		
Policija (kantonalna)	X		
Civilna zaštita (kantonalna)		X	
Predškolsko obrazovanje			X
Osnovno obrazovanje	X		
Srednjoškolsko obrazovanje	X		
Visoko obrazovanje	X		
Obrazovanje odraslih	X		
Socijalna zaštita		X	
Bolnice/domovi zdravlja			X
Specijalni zavodi u zdravstvu		X	
Kultura, fizička kultura i sport		X	
Urbanizam, prostorno uređenje i stambena politika			X
Komunalne i druge javne uslužne djelatnosti			X
Zaštita okoline		X	
Saobraćaj i transport			X
Poljoprivreda		X	
Vodoprivreda		X	
Šumarstvo		X	
Privreda		X	
Zapošljavanje			X
Informisanje			X

Kako teče budžetski proces?

Budžetski proces –

Proces koji obuhvata sve korake pri kreiranju i usvajanju Budžeta.

Budžetski proces se zasniva na analizi ostvarenja prihoda u proteklom periodu, procjenama ekonomskih kretanja, prioritetnim ciljevima i poslovima iz nadležnosti Kantona, planiranim projektima i programima. Donošenje Budžeta Kantona propisano je Zakonom o budžetima u FBiH, kojim su utvrđeni postupci/koraci i krajnji rokovi u pripremanju, izradi i usvajanju Budžeta.

Aktivnosti započinju u 6. mjesecu, pripremom i analizom **DOB**-a za Zeničko-dobojski kanton, te slanjem Uputstva (Instrukcije) za izradu Budžeta budžetskim korisnicima. Na osnovu budžetskih zahtjeva korisnika budžeta Kantona, Ministarstvo finansija vrši usaglašavanja te pristupa izradi Nacrta Budžeta. Nacrt Budžeta utvrđuje Vlada, a prihvata ga Skupština Kantona, nakon čega slijede javne rasprave o Nacrtu. Poslije provedenih javnih rasprava, Skupština razmatra Prijedlog Budžeta i donosi Budžet. Aktivnosti na donošenju Budžeta za narednu godinu uglavnom traju do 31.12. tekuće godine. Donesena budžetska dokumenta se objavljuju. Ukoliko se do 31.12. tekuće godine ne donese Budžet, donosi se Odluka o privremenom finansiranju za prva 3 mjeseca godine za koju se donosi Budžet.

U tekućoj godini planirani budžetski okvir se realizuje, a raspoloživa sredstva se troše prema utvrđenim namjenama i programu, o čemu se Vlada izvještava kvartalno, polugodišnje i godišnje, a Skupština Kantona godišnje. Ostvarenje Budžeta se analizira, nadzire i prati, a u slučaju odstupanja, vrše se izmjene Budžeta po istoj zakonskoj proceduri. Ured za reviziju institucija u FBiH vrši kontrolu i **reviziju izvršavanja** Budžeta i izvještavanja. Slijedi grafički prikaz budžetskog ciklusa.

DOB –

Dokument Okvirnog Budžeta je akt koji sadrži makroekonomske projekcije i prognoze priliva i odliva budžetskih sredstava za naredne tri godine, a na kom se zasniva priprema i izrada godišnjeg Budžeta.

Revizija –

postupak ispitivanja tačnosti, potpunosti, vjerodostojnosti, zakonitosti i objektivnosti.

Grafikon 1: Budžetski ciklus sa naglaskom na mjesece kada se građani mogu uključiti (polja označena narandžastom bojom) i kako to mogu da učine.

5. mjesec

Početak budžetskog kalendara. Vlada Kantona je obavezna da započne pripremu dokumenta Okvirnog Budžeta (DOB-a).

6. mjesec

Ministarstvo finansija Zeničko-dobojskog kantona treba da budžetskim korisnicima Kantona prosljedi Uputstvo (Instrukciju) o pripremanju Nacrta Budžeta (daje projekcije budžetskih sredstava i ograničenja potrošnje za budžetske korisnike, postupak i dinamiku pripreme Budžeta).

8. mjesec

Budžetski korisnici podnose zahtjeve Ministarstvu finansija za sljedeću godinu. **Kroz zahtjeve korisnika budžeta mogu biti ispoljene i potrebe građana koji djeluju putem NVO i udruženja građana.**

9. mjesec

Ministarstvo finansija sprovodi konsultacije sa budžetskim korisnicima u vezi sa njihovim zahtjevima i prioritetima budžetske potrošnje. Priprema se Nacrt Budžeta, koji je usklađen sa smjernicama iz Uputstva (Instrukcije).

10. mjesec

Ministarstvo finansija upućuje Nacrt Budžeta Vladi Kantona, Vlada utvrđuje Nacrt Budžeta i dostavlja ga Skupštini Kantona.

11. mjesec

Nakon prihvatanja Nacrta Budžeta od strane Skupštine, organizuju se javne rasprave. Primjedbe i sugestije sa javne rasprave se sumiraju i eventualno ugrađuju u tekst Prijedloga Budžeta. **Tokom Javnih rasprava, građani i NVO mogu iznijeti određene zahtjeve.**

12. mjesec

Vlada Kantona utvrđuje Prijedlog Budžeta i upućuje ga Skupštini Kantona. Radna tijela Skupštine Kantona raspravljaju o predloženom Budžetu, daju mišljenje i prijedloge – amandmansko djelovanje. **Interesne grupe, nevladine organizacije i građani mogu dostaviti svoje zahtjeve poslanicima da lično, ili kroz radna tijela djeluju amandmanski.** Skupština – zakonodavno tijelo donosi predloženi Budžet sa prihvaćenim amandmanima.

Opći (makroekonomski) okvir za donošenje Budžeta

Makroekonomski okvir –
Odnosi se na funkcionisanje i upravljanje cjelokupnom ekonomijom.

Posljednji raspoloživi podaci za 2015. godinu nagovještavaju poboljšanje ekonomskih aktivnosti i jačanje ekonomskog rasta u zemljama EU u odnosu na prethodnu godinu. To predstavlja glavnu odrednicu za kretanja industrijske proizvodnje u BiH. Tokom 2016. godine očekuje se da će pozitivniji ambijent u međunarodnom ekonomskom okruženju, praćen stabilizacijom u sektoru za proizvodnju električne energije, omogućiti postepeni oporavak industrijske proizvodnje u Bosni i Hercegovini sa rastom od 4,8%. U 2016. godini očekuje se nastavak trenda pozitivnog ekonomskog rasta u zemljama EU od oko 2,1%. Ovaj rast će biti potpomognut i jačanjem investicija, sa godišnjom stopom rasta od oko 4,6%. Oporavak gotovo svih sektora ekonomije u EU pozitivno će se odraziti na proizvodne procese, kako u širem regionu, tako i u Bosni i Hercegovini, a predviđa se rast za 5,4%.

U periodu 2015–2016. godine se očekuje nastavak postepenog poboljšanja situacije u okruženju i jačanja ekonomskog rasta u BiH. Očekivano jačanje ekonomskog rasta i zaposlenosti u okruženju bi trebalo osigurati značajan rast ne samo izvoza, nego i domaće tražnje koja se u velikoj mjeri finansira inostranim prilivima.

Pored postepenog poboljšanja situacije u okruženju, projekcije ekonomskog rasta BiH za period 2015–2016. podrazumijevaju odsustvo elementarnih nepogoda (suša i poplava) i normalnu hidrološku situaciju u hidroelektranama, uz uobičajen nivo remonta u elektroenergetskom sistemu.

Takođe, očekivana stabilizacija svjetskih cijena bi trebalo da zaustavi **deflaciju** u 2016. godini, koja je u prethodnom periodu predstavljala ozbiljnu prijetnju za ekonomski rast u BiH.

Deflacija –
Opći pad cijena.
Suprotna inflaciji.

Pomenuti faktori i pretpostavke bi trebalo da dovedu do postepenog jačanja ekonomskog rasta u Bosni i Hercegovini u 2015. godini na stopu od 2,6%, odnosno 3,2% 2016. godine. Postepeno normaliziranje situacije i vraćanje ekonomije na

Vanjskotrgovinski deficit –

Manjak koji nastaje kada se više kupuje iz inostranstva nego što se inostranstvu prodaje.

početni trend, upućuje da bi ovaj rast trebalo da počiva, prije svega, na domaćoj tražnji, uz skroman negativan doprinos **vanjskotrgovinskog deficita**.

Projekcija prihoda u 2016. godini je zasnovana na projektovanim relevantnim makroekonomskim pokazateljima za navedeni period, **sezonskoj šemi naplate** i projekcijama pojedinih kategorija prihoda za 2015. godinu, te efektima izmjena politika u oblasti carina i akciza na duhan. Zakon o porezu na dohodak („Službene novine Federacije BiH“, broj: 10/08, 9/10, 44/11, 7/13 i 65/13), koji je u primjeni od 01.01.2009. godine, donio je pozitivne efekte u oblasti direktnog oporezivanja, zamjenivši niz drugih poreza koje su plaćali građani. On uključuje oporezivanje dohotka od nesamostalne i samostalne djelatnosti, dohotka od imovine i imovinskih prava, od ulaganja kapitala, te od dobitaka ostvarenih sudjelovanjem u nagradnim igrama i igrama na sreću. Porez na dohodak je prihod koji pripada kantonalnim i gradskim/općinskim budžetima i dijeli se prema *Zakonu o pripadnosti javnih prihoda Zeničko-dobojskog kantona* (Službene novine Zeničko-dobojskog kantona, broj: 1/06, 2/06, 5/06 i 7/09).

Sezonska šema naplate –

Procjena naplate prihoda korigovana za uobičajene promjene pojedinih prihoda tokom određenih perioda u godini.

Indirektni porezi –


Uvozne i izvozne carine, akcize, porez na dodatnu vrijednost i svi drugi porezi obračunati na robu i usluge, uključujući poreze na promet i putarine.

Pored prihoda od **indirektnih poreza**, u skladu sa Zakonom o pripadnosti javnih prihoda u Federaciji BiH, prikupljaju se i drugi porezi, koji uključuju porez na dobit pravnih lica, porez na dohodak, poreze na imovinu i ostale poreze.

Na kraju, treba napomenuti da se Budžet Kantona u potpunosti oslanja na ove makroekonomske pokazatelje i projekcije imajući u vidu propise na osnovu kojih se vrši raspodjela određenih poreznih i neporeznih prihoda. Za skoro većinu poreznih i neporeznih prihoda su definisana pravila njihove raspodjele za određene nivoe vlasti (država–entitet–kanton–grad/općina).

Kako se puni budžet

Zeničko-dobojskog kantona?



Ukupna sredstva budžeta Kantona, uključujući transfere sa drugih nivoa vlasti, a koja su planirana za 2016. godinu, iznose **285.525.000 KM.**

Porez na dobit pojedinaca i preduzeća

15.271.466 KM

Porez na plaću

929.000 KM

Porez na dohodak

23.669.739 KM

Ostali porezi

14.000 KM

Indirektni porezi

185.694.433 KM

Prihodi od poduzetničke

aktivnosti i imovine

1.920.527 KM

Kantonalne sudske takse

4.650.750 KM

Kantonalne

administrativne

takse 840.000 KM

Ostali neporezni prihodi

4.108.356 KM

Naknada za korištenje

poljoprivrednog

zemljišta u

nepoljoprivredne

svrhe 1.015.200

Kazne i troškovi

postupka

4.265.450 KM

Vodne naknade

6.500.000 KM

Prihodi od pružanja

usluga građanima

6.017.387 KM

Cestovne naknade

2.000.000 KM

Naknade za zaštitu okoliša

3.350.000 KM

Posebna naknada za zaštitu

od prirodnih i drugih nesreća

2.511.650 KM

Naknada za korištenje šuma

1.205.837 KM

Budući da se nastavlja ekonomska kriza, pojedini budžetski prihodi stagniraju, što uslovljava planiranje Budžeta u prethodno definisanom okviru.

Budžet Zeničko-dobojskog kantona se najvećim dijelom puni iz poreznih prihoda, koji se dijele između različitih nivoa vlasti (PDV, porez na dohodak, te određene naknade i **transfer**), a koji čine skoro 80% budžeta. Na ove prihode Kanton ne može značajno uticati.

Transfer –
Doznaka sredstava sa jednog na drugi račun, najčešće sa jednog na drugi nivo vlasti.

Kada posmatramo neporezne prihode, vidimo da su najznačajniji sljedeći prihodi:


- Prihodi od poduzetničke aktivnosti i imovine – 1.920.527 KM;
- Kantonalne sudske takse – 4.650.750 KM;
- Naknada za korištenje poljoprivrednog zemljišta u nepoljoprivredne svrhe – 1.015.200 KM
- Vodne naknade – 6.500.000 KM;
- Cestovne naknade – 2.000.000 KM;
- Naknade za zaštitu okoliša – 3.350.000 KM;
- Naknada za korištenje šuma – 1.205.837 KM;
- Posebna naknada za zaštitu od prirodnih i drugih nesreća – 2.511.650 KM;
- Prihodi od pružanja usluga građanima – vlastiti prihodi korisnika budžeta – 6.017.387 KM;
- Novčane kazne i troškovi postupka – 4.265.450 KM.

Vodne naknade i prihodi od pružanja usluga predstavljaju više od 2% ukupnih budžetskih prihoda i primitaka za 2016. godinu. Istovremeno, značajno je napomenuti i segment prihoda koji dolazi od sudskih taksi, naknada za zaštitu okoliša, te naplaćenih kazni i troškova sudskih postupaka (svi ovi prihodi su nešto veći od 1% od ukupno planiranih budžetskih prihoda i primitaka).

Gdje se raspoređuje budžetski novac ?

Prioriteti u potrošnji za 2016. godinu su i dalje stabilizacija budžeta i izdvajanje za obrazovanje, policiju i pravosuđe (u najvećoj mjeri na plaće zaposlenih), otplatu po osnovu zaduženja, socijalnu zaštitu, te **tekući** i **kapitalni izdaci** za koje su Vladinim dokumentima utvrđeni prioriteti finansiranja.

GDJE SE RASPOREĐUJE BUDŽETSKI NOVAC?



Kada posmatramo strukturu budžetske potrošnje, vidljivo je da se u 2016. godini najviše sredstava namjerava izdvojiti za rashode plaća i nadoknada troškova za 8223 zaposlenih u kantonalnim institucijama (uključujući i doprinose), što je 57,72% od ukupno predviđenih rashoda (285.225.000 KM). Ovdje spadaju plaće za zaposlene u Vladi i njenim ministarstvima, upravama i službama, policiji, obrazovanju, pravosuđu, te ostalim institucijama kojima je Kanton osnivač. Treba napomenuti da se za materijal i usluge svih ovih navedenih institucija planira izdvojiti 11,73% od ukupnih rashoda.

U sklopu tekućih transfera, za šta se planira izdvojiti 21,83% ukupnih rashoda, najvažniji se odnose na:

- Tekuće transfere pojedincima (stipendije, socijalna pomoć, pomoć pri zapošljavanju, pomoć za stanovanje, itd.) – 37.667.898 KM;
- Tekući transferi drugim nivoima vlasti (primarno Gradu Zenici i općinama) – 9.948.224 KM;
- Tekući transferi neprofitnim organizacijama – 2.133.670 KM;
- **Subvencije** javnim preduzećima – 10.035.000 KM;
- Subvencije privatnim preduzećima i poduzetnicima – 1.600.000.

Subvencije – Tekući transferi koji predstavljaju bespovratnu pomoć pravnim ili fizičkim licima uslovljenu posebnom vrstom djelatnosti ili statusom primaoca.

Budžetska rezerva – Novčana sredstva koja se u budžetu izdvajaju za hitne i neplanirane situacije.

Teuća **budžetska rezerva** iznosi 0,02% predviđenih rashoda, odnosno 50.000 KM.

Struktura potrošnje se može posmatrati i po oblastima tj. namjeni/funkciji utroška predviđenih sredstava.


Na sljedećem grafikonu se vidi potrošnja po oblastima, sa namjenskim doznakama od ostalih nivoa vlasti.



U toku 2016. godine, najviše se planira izdvojiti za oblast obrazovanja (osnovno, srednjoškolsko i visoko obrazovanje) 131.315.012 KM i oblast javnog reda i sigurnosti (59.579.427 KM). U okviru ove dvije oblasti zaposleno je preko 7.000 osoba koje plaću primaju iz kantonalnog budžeta. Za socijalnu zaštitu se planira izdvajanje od oko 34.748.460 KM.

Izvršenje budžeta


Vidljivo je da su rashodi u 2016. godini planirani na nešto višem nivou (285.225.000 KM) u odnosu na njihovo izvršenje u 2015. godini (268.239.031 KM). Na grafikonu se vidi da se je u posljednjih 5 godina zabilježen trend rasta rashoda.




Obrazovanje

Najveći dio budžeta, oko 46,04% ili 131.315.012 KM, i dalje se planira izdvojiti za funkcionisanje obrazovnog sistema u Zeničko-dobojskom kantonu.

S tim u vezi treba napomenuti da se najviše planira izdvojiti za potrebe funkcionisanja osnovnog obrazovanja (68.048.337 KM) i srednjoškolskog obrazovanja (38.377.896 KM). Za potrebe visokog obrazovanja se planira izdvojiti 14.362.839 KM, dok se za ostale troškove obrazovanja (Pedagoški zavod, Ministarstvo za obrazovanje, nauku, kulturu i sport...) planira izdvojiti 10.525.940 KM.



Udio obrazovanja u Budžetu za 2016.




Struktura izdvajanja za obrazovanje





Podrška zapošljavanju i privatnom sektoru

Vlada Zeničko-dobojskog kantona i dalje namjerava realizovati programe i projekte u cilju pružanja podrške zapošljavanju i razvoju privatnih preduzeća i preduzetnika. Za te namjene je predviđeno 5,89% od ukupno planiranih tekućih transfera.




Treba napomenuti da je u 2016. godini Budžetom Zeničko-dobojskog kantona predviđeno izdvajanje 1.510.000 KM za subvencije privatnim preduzećima i preduzetnicima. Istovremeno, za poticaje aktivnim mjerama zapošljavanja planira se izdvojiti 700.000 KM. Imajući u vidu programsku opredjeljenja Vlade, treba napomenuti i poticaje za zapošljavanje branilaca i članova njihovih porodica u iznosu od 1.360.000 KM.



Poljoprivreda





Vlada Zeničko-dobojskog kantona nastavlja sa realizacijom programa i projekata u oblasti poljoprivrede. Za te namjene je predviđeno 5,63% od ukupno planiranih tekućih transfera. Tako se za subvencije za poticaj razvoja u poljoprivrednoj proizvodnji planira izdvojiti iznos od 2.500.000 KM što je skoro 1% od ukupnih rashoda (odnosno 4,02% ukupno planiranih tekućih transfera). Istovremeno, Vlada Kantona će *Programom utroška za 2016. godinu* odrediti potrošnju planiranih 1.000.000 KM za projekte koji se finansiraju iz sredstava za pretvaranje poljoprivrednog zemljišta u nepoljoprivredno zemljište.



Izdvajanja za sport

Postojeći finansijski okvir i zakonom definisane obaveze Zeničko-dobojskog kantona ne ostavljaju mnogo prostora za finansiranje oblasti sporta. Međutim, ipak se za ove namjene planira izdvojiti 1,27% ukupnih planiranih tekućih rashoda i to: 650.000 KM kao tekući transfer za sport, namijenjen u najvećoj mjeri sportskim organizacijama na području Kantona, te 80.000 KM za sufinansiranje sportskih takmičenja RVI i 63.000 KM za zdravstvenu zaštitu sportista.





Socijalna zaštita i transferi boračkim kategorijama

U cilju zadovoljavanja potreba korisnika usluga socijalne zaštite i održavanja njihovog socijalnog standarda, Vlada Zeničko-dobojskog kantona planira izdvojiti 34.748.460 KM, odnosno 12,18% ukupno planiranih budžetskih rashoda za 2016. godinu.

U sklopu izdvajanja za socijalnu pomoć, najviše se planira izdvojiti za naknade za porodijsko odsustvo, smještaj u ustanove socijalne zaštite, dodatak za djecu, transfer civilnim žrtvama rata, te boračkoj populaciji i njihovim porodicama.

Socijalna zaštita
34.748.460 KM





Kapitalni transferi i izdaci

Za kapitalne transfere i izdatke planira se izdvajanje 4,26% od ukupno planiranih rashoda za 2016. godinu.

Najveći kapitalni transferi odnose se na kapitalni transfer za zdravstvo (2.400.000 KM), kapitalni transfer Kantonalne uprave civilne zaštite (500.000 KM), te kapitalni tranfer Institutu za zdravlje i sigurnost hrane Zenica (160.000 KM).

Ujedno, Budžetom za 2016. godinu je predviđena nabavka građevina u iznosu od 1.885.000 KM i nabavka opreme u iznosu od 2.627.668 KM. Za rekonstrukciju i investiciono održavanje je predviđen iznos od 3.712.445 KM (za puteve, obrazovne institucije, Kantonalnu upravu za šumarstvo, policiju i pravosuđe, itd.).





Budžet za građane Zeničko-dobojskog kantona je pojednostavljeni i ilustrovani prikaz određenih dijelova dokumenta Budžet Zeničko-dobojskog kantona.

Ovaj jednostavni i ilustrativni izvještaj omogućit će vam da razumijete kako vlast Zeničko-dobojskog kantona za vas i u vaše ime troši novac.

Pogledajte i pitajte nas!

Podaci za kontakt sa građanima:

MINISTARSTVO FINANSIJA

Nada Delibašić, pomoćnik ministra

Broj telefona: 032 460 765; 460 771

nada.delibasic@zdk.ba

ODSJEK ZA PLANIRANJE I IZVRŠENJE BUDŽETA

Nermin Piljug, šef Odsjeka za planiranje i izvršenje budžeta

Broj telefona: 032 460 770; 460 771

min.finansije@zdk.ba

Budžet za građane Zeničko-dobojskog kantona:

<http://www.zdk.ba/ministarstvo-finansija/itemlist/category/201-budzet-za-gradane>

Budžet Zeničko-dobojskog kantona:

<http://www.zdk.ba/budzet/itemlist/category/204-budzet-2016>



Open
Society Fund
Bosnia & Herzegovina



Fond
otvoreno društvo
Bosna i Hercegovina

CDN
misliradionica